

Powšitkowne WOZJEWJENJA

njedźelu, 26. januara 2014

Hłowna zhromadźizna TCM

Předsydstwo Towarstwa Cyrila a Metoda z.t. (TCM) přeprošuje wšitkich člonow towarstwa, člonow sekcijow a korporacijow kaž tež zajimowanych hosći na swoju hłownu wólbnu zhromadźiznu pjatk, 14. februara, do Ralbic. Započnjemy w 19.00 hodź. z Božej mšu w cyrkwi. Přizamknje so zhromadźizna na „Radlubinje“.

Jurij Špitank, předsyda TCM

Dom swjateho Jana w Smječkecach – 20 lět dom Charity

Składnostnje 20. róčnicy Domu swjateho Jana w nošerstwje Charity přeprošujemy pónđzelu, 27. januara, w 19 hodź. na dwurěčny swětłowobrazowy přednošk Gerharda Schmelinga pod temu „Janska kupjel na starych pohladnicach a wobrazach“. Wopytowarjow wočakuje zajimawa prezentacija dotal njewidžanych historiskich wobrazow a přednošk wo wuznamje Janskich kupjelow.

Tadej Šiman

Zakładny kurs za přewod ćežkochorych a mrějacych

Přihotowanski kurs za přewod ćežkochorych a mrějacych poskičuje ambulatna hospicna služba Charity wot 29. januara hač do 26. februara. Zajimcy njech so w Domje Charity w Kamjencu přizjewja, telefonowe čisło (0 35 78) 37 43 12.

Přeprašenje na Maćičnu akademiju

Wědomostna sobudželačerka w Serbskim instituće Trudla Malinkowa přednošuje štwórtk, 30. januara, w 19.30 hodź. w Budyskim hosćencu „Wjelbik“, Žitna 7, k temu „Serbske pomniki. Materielne swědky narodnjeje identity“. Přednošk budže w serbskej rěči, zastup je darmotny.

Stawizniska sekcija Maćicy Serbskeje

Domyswjećenje w Don Boskowym domje

Na swjedženju swjateho Don Boska pjatk, 31. januara, přeprošuje dekanatne dušepastyrstwo wšitkich młodostnych ze serbskich wosadow na domyswjećenje do Don Boskoweho domu we Worklecach. Započatk je z Božej mšu w 19 hodź. we Worklečanskej kapalce. Domyswjećenju přizamknje so zhromadny wječor.

Zetkanje putnikow do Tinje

Putnicy, kotřiž pobychu loni w oktobru w domje „Sodalitas“ w Tinje w Awstriskej, zetkaja so pjatk, 31. januara, po wječornych kemšach, pola Šmitec w Radworju. Boža mša je we 18.30 hodź. w cyrkwi.

Putniskej jězbje na Morawu a do Nižozemskeje

Do Českeje powjedže nas lětuša přenja putniska jězba, a to wot wutory, 6. meje, hač do pjatka, 9. meje, na hnadownej městnje Svatý Hostýn a Svatý Kopeček. Na druhej jězbje wot pónđzele do soboty, 11. do 16. awgusta, pojedžemy do wuznamneho putniskeho města Kevelaer w serwjernej Němskej. Wottam wulećimy sej do Brüssela (Belgiska) a Maastrichta (Hollandska). Přizjewić móža so zajimcy pola mje w Radworju, telefonowe čisło (03 59 35) 2 04 25.

Terezija Kubašec